

PAN E VIN DE L'ANO DOMILASEDESE

25 FILASTROCHE PAR L'ANO 2016

Pan e vin e bisatele
che le femene le vegni bele....

Da lontan e da vissin
el pan e vin

El pan e vin !
El pan e vin !
El pan e vin !

*Pan e vin del Santo Ano
se semo trovai in Comina come ogni ano
e speremo che stavolta a Pordenon
le robe le vada par benon.*

Da lontan e da vissin
el pan e vin

*Pan e vin dei stornei
anca contro el falò xe sempre quei:
no i vol presepi, no i rispeta le tradission
e noialtri semo destinai a finir intèl canton*

Da lontan e da vissin
el pan e vin

*Pan e vin de Pordenon
anca sto ano se rinova la tradission;
le polveri sotili le ga fat un fumeron
ma noialtri semo qua co la solita passion*

Da lontan e da vissin
el pan e vin

*Pan e vin del salva banche
ai corentisti i ghe ga ciavà le palanche
ades i puareti i protesta senza schei
ben savendo che i se li ga magnai sempre quei*

Da lontan e da vissin
el pan e vin

*Pan e Vin del corentista
a vardar i conti tuti i se ratrista,
Bortoletto a Pordenon el ga tignuo 'na lession
sveieve citadini e lexè le carte par benon!*

Da lontan e da vissin
el pan e vin

*Pan e vin del munisipio
a giugno se incominsia da prinsìpio:
par el sindaco de Pordenon
xe un ingorgo de ambission*

Da lontan e da vissin
el pan e vin

*Pan e Vin del ribalton
i ga paura a Pordenon
che la lista dei Grillini
i li mandi tuti in via Cappuccini*

Da lontan e da vissin
el pan e vin

*Pan e Vin del candidà
ch'el xe stà già sondà
xe bel partir senza aversari
ma co i riva xe cavoli amari*

Da lontan e da vissin
el pan e vin

*Pan e vin de la sera
xe cambià el Presidente de la Fiera
nissun de qua el gera perfetin
e alora i ga trovà un Patavin*

Da lontan e da vissin
el pan e vin

*Pan e vin e bicerini
se ricorda Pier Paolo Pasolini
dopo quaranta ani no'l xe stà desmentegà
e Anzovino co 'na canson i lo ga celebrà*

Da lontan e da vissin
el pan e vin

*Pan e vin de le nove strade
el comun ghe ne ga fate de monade:
xe tuto un gran ribalton tra rotonde
e incroci incasinai
i pordenonesi, puareti, i xe finii in mezo ai guai*

Da lontan e da vissin
el pan e vin

*Pan e vin senza sconto
el pian regolator xe quasi pronto
ma se nissun ghe mette i schei par le strutture
el resterà su la carta spetando bondanse future*

Da lontan e da vissin
el pan e vin

*Pan e vin in quantità
i ga fat el piano de la mobilità:
tante bici e poche auto par viagiare come non mai
i mezi pubblici par i ansiani i se li ga desmentegai*

Da lontan e da vissin
el pan e vin

*Pan e Vin col picon
i ga costruio in ogni canton
case vode ghe ne xe un caldieron
e adés tuti i serca la solussion.*

Da lontan e da vissin
el pan e vin



... CONTINUA LE FILASTROCHE

*Pan e Vin dei rifugiai
davero in tanti i xe rivai
el comun no'l sa come tenderghe
e lori i se acampa intèle tende*

*Da lontan e da vissin
el pan e vin*

*Pan e vin co la brovada
anca COIN ga serà in contrada:
oramai non se conta più quei che i sera
e'l comercio no'l xe più quel ch'el gera*

*Da lontan e da vissin
el pan e vin*

*Pan e Vin dei ani passai
e i Marò no i xe ancora tornai
tuti i dixè che i li vol a casa
ma la pratica no l'è stada ancora evasa*

*Da lontan e da vissin
el pan e vin*

*Pan e vin del Bambinello
no ghe gera el fantulin intèl "cestello":
prima i ga dito che i lo gaveva robà
ma invesse i se lo gera desmentegà*

*Da lontan e da vissin
el pan e vin*

*Pan e vin con tanto sal
semo in atesa del novo ospéal
speremo che sto qua el sia l'ano bon
par farghe scuminsiar la costrussion*

*Da lontan e da vissin
el pan e vin*

*Pan e vin del'inovassion
a Vila Cattaneo le start-up de Pordenon:
la Pietro Edo la organisa master ecelenti
par darghe risalto ai meio talenti*

*Da lontan e da vissin
el pan e vin*

*Pan e vin col bacalà
'naltro ano xe passà
e se'l fumo va a marina
ciapa el sac e va a farina*

Da lontan e da vissin
el pan e vin

*Pan e vin in abondansa
se tuti i ga un fià de creansa
un toc de pinsa e vin brulè
par tuti voialtri ghe ne xè*

Da lontan e da vissin
El pan e vin

*Pan e vin intèla Comina
se scuminsia da la matina
a preparar la pira pal fogo
e la sera semo in tanti in sto logo*

Da lontan e da vissin
El pan e vin

*Pan e vin del caligo
e mi altro non te digo
canta e bala se te vol
par rinovar la tradision*

Da lontan e da vissin
el pan e vin

*Pan e vin co la litania
ades che la recita la xe finìa
andemo tuti in osteria*

Pan e vin e bisatele
Che le femene le resti bele....

El pan e vin !
El pan e vin !
El pan e vin !

**Litanie scritte da:
Anonimo Pordenonese**

**Recitate da:
Bianca Manzari**



I CANTI EPIFANICI TRADIZIONALI

Pan e vin e mortadela
che la biava la vegni bela

Pan e vin co la segàla
par le bestie intèla stala

Pan e vin e fasioi
par i nostri fioi

Pan e vin e salame
par le vedrane

I PRONOSTICI IN BASE ALLA DIREZIONE DEL FUMO

S'el fun el va in marina
ciapa el sac e va a farina.

Le fulis'cie verso sera (ovest)
polenta a pien caldiera.

S'el fun el va al levar del sol (est)
fien, biava e vin
che se ne impinise i tin.

S'el fun el va in montagna
tuto l'ano se fa cucagna.



Comune di Pordenone



Associazione
ProPordenone



Fondazione
Opera Sacra Famiglia



Associazione
Panorama



Provincia di Pordenone